


160 150 140 130 120 110 100 90 80 70 60 50 40 30 20 10 1


騰

天道運意繕刻書

仁15
2039
5







莊子膚齋口義卷之五

荅

膚

齋

林

希逸



莊子外篇天道第十三

天道運而無所積故萬物成帝道運而無所積故
天下歸聖道運而無所積故海內服明於天通於
聖六通四辟於帝王之德者其自爲也昧然無不
靜者矣聖人之靜也非曰靜也善故靜也萬物無
足以饒心者故靜也水靜則明燭鬚眉平中准大
匠取法焉水靜猶明而况精神聖人之心靜乎天
地之鑒也萬物之鏡也

帝道聖道本難分別莊子之意蓋以帝爲三皇聖爲五帝也運而無積即是純亦不已無積字更分曉此段主意却在靜字上至靜之中運而無積何嘗是枯木死灰但讀者不察之耳六通四辟猶言東西南北上下無所障礙也昧然者冥然之意也聖人之靜也非曰靜也善故靜也此一句最精神言聖人非以靜爲好事故欲如此靜萬物不足以撓動其心故不求靜而自靜也鏡與撓同以水以鏡爲靜之喻即眼前說話但是文字精到

夫虛靜恬淡寂漠無爲者天地之平而道德之至故帝王聖人休焉休則虛々則實實者倫矣虛則靜々則動々則得矣靜則無爲無爲也則任事者責矣無爲則俞々則者憂患不能處年壽長矣夫虛靜恬淡寂漠無爲者萬物之本也明此以南鄉堯之爲君也明此以北面舜之爲臣也以此處上帝王天子之德也以此處下亥聖素王之道也以此退居而間游江海山林之士服以此進爲而撫世則功大名顯而天下一也

虛靜恬淡寂漠無爲把一靜字演作八字要得

分曉也平定也至極也言此乃天地一定之理
道德極至之事也休止也言帝王聖人之心止
於此也亦猶曰止於至善也休則虛即惟道集
虛吉祥止々也但此下又言虛則實々者倫矣
發得又精神虛則實即禪家所謂眞空而後實
有也倫理也實理之中自有條理便是渾然之
中有槩然者上句發了虛則實下句又言虛則
靜々則動便是一動一靜互爲其根動而無不
當其宜故曰動則得矣任事者責言各任其事
而盡其責是無爲而無不爲也渝々安樂之貌

憂患不能處言不入於憂患也處有陷入之意
憂患不能入便是仁者不憂年壽長矣便是靜
者壽也四句以虛靜無爲字相生成文此莊子
筆法也到此又提起虛靜恬淡八字而斷之以
萬物之本々者初也言此理出於未有萬物之
初處上即南鄉之君也處下不仕者也玄聖素
王言有聖人之德無聖人之位也退居而閑游
隱者也進爲而撫世用於時者也觀此一句其
意何嘗不欲用世何嘗不以動靜爲一
靜而聖動而王無爲也而尊樸素而天下莫能與

之爭美。夫明白於天地之德者。此之謂大本大宗。
與天和者也。所以均調天下。與人和者也。與人和
者。謂之人樂。與天和者。謂之天樂。

靜則爲聖。動則爲王。即是內聖外王四字無爲
也。而尊々貴也。言天下之道莫貴於無爲也。樸
素無文采也。雖若樸素而天下之美莫過於此。
故曰樸素而天下莫能與之爭美。明白者言曉
然如此也。若知此天地之德。則可以與天爲徒。
故曰與天和者也。和合也。大本大宗。即是贊羨
自然之德。與自本自根意同。均調天下。則與人

合亦猶堯曰。予天之合也。我人之合也。既曰天
和人和。又曰人樂。天樂。鼓舞發越其筆勢大抵
如此。

莊子曰。吾師乎。吾師乎。整萬物而不爲矣。澤及萬
世而不爲仁。長於上古而不爲壽。覆載天地。刻彫
衆形。而不爲巧。此之謂天樂。

此數句與六宗師篇同。却又著莊子曰三字。前
曰許由之言。今以爲自言。可見件々寓言。豈可
把作實話看。

故曰。知天樂者。其生也天行。其死也物化。靜而與

陰同德動而與陽同波故知天樂者無天怨無人
非無物累無鬼責故曰其動也天其靜也地一心
定而王天下其鬼不祟其魂不疲一心定而萬物
服言以虛靜推於天地通於萬物此之謂天樂天
樂者聖人之心以畜天下也

天行々乎天理之自然也物化隨萬物而化也
靜則爲陰動則爲陽同波同流也聖人門只曰
不怨天不尤人此又添無物累無鬼責兩句愈
自精神出鬼而見於人則曰崇其鬼不崇言神
藏而不露也其魂不疲言精神不倦也曰鬼曰

魂即精神是也心定則精神自定萬物自服以
虛靜之理而行於天地萬物之間故曰推於天
地而通於萬物以畜天下即以善養人者服天
下也

夫帝王之德以天地爲宗以道德爲主以無爲々
常無爲也則用天下而有餘有爲也則爲天下用
而不足故古之人貴夫無爲也上無爲也下亦無
爲也是下與上同德下與上同德則不臣下有爲
也上亦有爲也是上與下同道上與下同道則不
主上必無爲而用天下々必有爲々天下用此不

易之道也

莊子卷五

五

天地道德皆無爲之理而已此段又將無爲與有爲對說以無爲爲君之道以有爲爲臣之道下與上同德則不臣者言臣當勞也上與下同道則不主者言君當佚也用天下君也爲天下用臣也如此說臣主又是一意不可與在宥篇天道人道同說若如此拘泥便讀莊子不得旦如此篇既言君當無爲臣當有爲而前章又曰明此以北面舜之爲臣也又曰以此進爲而撫世則功六名顯則臣道亦無爲矣豈其說自相

戾乎所以道若如此拘泥則讀莊子不得

故古之王天下者智雖落天地不自慮也辯雖彫萬物不自悅也能雖窮海內不自爲也天不產而萬物化地不長而萬物育帝王無爲而天下功故曰莫神於天莫富於地莫大於帝王故曰帝王之德配天地此乘天地馳萬物而用人群之道也落天地言龍絡也落與絡同彫萬物者言其巧也萬物自生非天生之萬物自長非地長之故曰天不生地不長帝王以無爲而成天下之功亦與天地同也乘天地者猶曰乘六龍以御天

也馳萬物者役使群動也此段只是贊說君道

無爲

長與養

本在於上末在於下要在於主詳在於臣三軍五兵之運德之末也賞罰利害五刑之辟教之末也禮法度數刑名比詳治之末也鐘鼓之音羽旄之容樂之末也哭泣衰絰隆殺之服哀之末也此五末者須精神之運心術之動然後從之者也末學者古人有之而非所以先也

自此以下又談有爲蓋以無爲爲本而以有爲爲末要在主君道無爲也詳在臣之道有爲也

威武文德之輔助故曰三軍五兵之運德之末也五兵弓矢矛戈戟也明刑以弼教故曰賞罰利害五刑之辟教之末也度數等差也刑名之物也比類例也詳纖悉也禮法度數鐘鼓羽旄皆非禮樂之本猶曰玉帛鐘鼓云乎哉也哀之末也即與其易也寧戚之意此數句甚乎平正精神之運心術之動然後從之蓋言皆由内心以生非由外鑠我也末學者古人有之而非所以先此一句尤好看得莊子何嘗欲全不用兵

刑禮樂

君先而臣從。父先而子從。兄先而弟從。長先而少從。男先而女從。夫先而婦從。夫尊卑先後。天地之行也。故聖人取象焉。天尊地卑。神明之位也。春夏秋冬。後四時之序也。萬物化作。萌區有狀。盛衰之殺。變化之流也。夫天地至神。而有尊卑先後之序。而况人道乎。宗廟尚親。朝廷尚尊。鄉黨尚齒。行事尚賢。大道之序也。語道而非其序者。非道也。語道而非其道者。安取道。

因上面一先字與一從字。又說許多譬喻。蓋言當先者先。當後者後。皆天地自然之理也。故聖

人取而法之。故曰尊卑先後。天地之行也。聖人取像焉。天地四時亦喻說也。化作化生也。詩言微亦作止。是也。萌之芽也。區之別也。言物生而其狀不同也。隨時變化。先盛後衰。亦是譬喻。先後之序。殺等也。盛者非一時。而盛衰者非一時。而衰皆有次第。故曰盛衰之殺。因先後而及尊卑。尊卑亦先後也。行事尚賢。言任職事以賢爲先也。齒爵親賢。亦天下自然之理。故曰大道之序。安取道者。言既不知其序。又安得有道也。宗廟尚親。昭穆世次也。

是故古之明大道者。先明天而道德次之。道德已明。而仁義次之。仁義已明。而分守次之。分守已明。而形名次之。形名已明。而因任次之。因任已明。而原省次之。原省已明。而是非次之。是非已明。而賞罰次之。賞罰已明。而愚智處宜。貴賤寢位。仁賢不肖襲情。必分其能。必由其名。以此事上。以此畜下。以此治物。以此修身。智謀不用。必歸其天。此之謂太平治之至也。

此段自言爲治之序。凡有九等。以天爲第一道德。爲第二仁義。爲第三分守。爲第四刑名。爲第五

五因任。爲第六原省。爲第七是非。爲第八賞罰。爲第九分守。職守也。形名之稱也。刑與形同。因任是因其所職而大任之也。原免也。省減也不任其事則免之。則省去之矣。是非旌別淑慝也。賞罰撻以記車服以彰之類也。莊子其言爲治之序如此。不知天討有罪。天命有德。賞罰何嘗非天。豈九變而後及之。如此議論便去聖賢遠甚。但言先明天次道德。其下又有此數節。亦不是舍粗而求精。愚智處宜。言當其任也。寢位亦猶當位也。襲安也。安其情實。則君子小人各有

所處也必由其名循名責實也智謀不用必歸其天言事之雖各有處而無容其心皆歸於自然而已此太平之世也

故書曰有形有名形名者古人有之而非所以先也古之語大道者五變而形名可舉九變而賞罰不可言也驟而語形名不知其本也驟而語賞罰不知其始也倒道而言迂道而說者人之所治也安能治人驟而語形名賞罰此有知治之具非知治之道可用於天下不足以用天下此之謂辯士一曲之人也禮法數度刑名比詳古人有之此下之

所以事上非上之所以畜下也

書古書也古書之中雖有形名之說而未嘗捨本以求末故曰非所以先若不知先後驟而言之則失其本始矣倒々置也迂逆也若逆此自然之道倒置其說則是治於人者是爲天下用也非用天下者也以形名賞罰爲治之具以分守仁義爲治之道何嘗差錯但說得衆雜余一曲一偏也上以畜下則是君道下以事上則是臣道比例也詳目也

昔者舜問於堯曰天王之用心何如堯曰吾不敷

無告不廢窮民苦死者嘉孺子而哀婦人此吾所以用心已舜曰羨則羨矣而未大也堯曰然則何如舜曰天德而出寧日月照而四時行若晝夜之有經雲行而兩施矣堯曰然則膠々擾々乎子天之合也我人之合也夫天地者古之所大也而蕡帝堯舜之所共美也古之王天下故者奚爲哉天地而已矣

敷嫚侮也苦哀憐之也嘉喜之也婦人寡婦也既與孺子對說雖無寡字而意自明天德自然之德也出寧者首出庶物萬國咸寧也日往則

月來寒往則暑來日月照而四時行也既晝而夜々而復盡常々如此經常也雲行雨施隨時自然此皆形容無爲而爲之意膠々擾擾言撓亂也堯曰我之所爲未及於汝未免自爲撓亂所以只合於人而未合於天也然則下三句謂堯自嘆之辭也天地者古之所大言天地自然之理自古及今莫大於此也共羨者共好之也王天下者無它爲但法天地則可矣前言堯舜既有抑揚此又與黃帝同說殊無輕重若泥其名字則窒礙不通矣

孔子西藏書於周室。子路謀曰。由聞周之徵藏史有老聃者。免而歸居。夫子欲藏書。則試往因焉。孔子曰善。往見老聃。而老聃不許。於是繙十二經以說。老聃中其說。曰太謾。願聞其要。孔子曰。要在仁義。老聃曰。請問仁義人之性邪。孔子曰。然。君子不仁則不成。不義則不生。仁義真人之性也。又將奚爲矣。老聃曰。請問何謂仁義。孔子曰。中心物愷。兼愛無私。此仁義之情也。老聃曰。意幾乎後言。夫兼愛不亦迂乎。無私焉乃私也。夫子若欲使天下無失其牧乎。則天地固有常矣。日月固有明矣。星辰

固有列矣。禽獸固有群矣。樹木固有立矣。夫子亦放德而行。循道而趨已至矣。又何偈々乎。揭仁義。若擊鼓而求亡子焉。意夫子亂人之性也。

西藏書於周室者。言西至周而欲觀其藏書也。繙反覆言之也。中其諭者。言方及半而老子以爲太繁太縵。言太汎漫也。物愷者。以物爲樂。與物爲一之意也。後言猶曰淺近之言也。幾乎危乎也。物之不齊。何由兼愛。此迂曲難行之說也。纔有無私之名。脣中便有箇私字。謂之無私字。便是有心。故曰無私焉乃私也。牧養也。欲使天

下無失其所養則天地之間物々皆有自然之造化何可容力但當依拔自然之德循行自然之道能如此已爲極矣故曰已至矣亡子逃子也擊鼓而求言勞苦而驚動世俗也如此乃是亂人之性故嘆而言之意嘆也夫子猶吾子也偶々勞力之貌

士成綺見老子而問曰吾聞夫子聖人也吾固不辭遠道而來願見百舍重趼而不敢息今吾觀子非聖人也鼠壤有餘蔬而棄殊不仁也生熟不盡於前而積斂無崖老子漠然不應士成綺明日復

見曰昔者吾有刺於子今吾心正郤矣何故也老子曰夫巧智神聖之人吾自以爲脫焉昔者子呼我牛也而謂之牛呼我馬也而謂之馬苟有其實人與之名而弗受再受其殃吾服也恒服吾非以服有服

百舍重趼而不敢息言其勞也趼足跟厚皮也食蔬之餘棄於鼠壤暗昧不明之地奸與昧同暗也是不愛物也故以爲不仁生熟不盡於前而積斂無崖言其積蓄有餘也生熟者生物熟物在目前者用不盡也猶且收積不已故曰積

歛無崖老子漠然不應是以不答之也刺者譏也卻退也向有所譏今其心盡退然無有謂既見之後忽然有覺也巧知神聖有爲之學也脫者離也言出乎其上也我旣無心呼馬呼牛聽汝而已苟有其實人與之名而弗受再受其殃此一句最純粹我若實有此事人以譏我而我乃拒之是兩重罪過也即是恥過作非又翻出此語服行也吾之所行常々如此非以爲當行而行之謂不自知也故曰吾服也桓服吾不以服有服即非曰靜也善故靜之意却如此下

四丁服字皆是奇筆處

士成綺鴈行避影寢行遂進而問脩身若何老子曰而容崖然而目衝然而顙頷然而口闊然而狀義然似繫馬而止也動而持發也機察而審知巧而覩於泰凡以爲不信邊境有人焉其名爲竊鴈行避影形容其側身之貌寢行一步躡一步也寢行遂進形容其躡足漸行漸進之貌崖然有崖異之狀衝然有突視之狀闕然口咷之狀義然堅固之狀馬性欲馳雖繫止而自有奔突之意即坐馳之意也形容得最好動而持舉動

之間有矜持之貌也發也機即所謂其發若機括其司是非之謂也察而審者好用明察而又精審略不藏蓄也知巧而覩於泰自恃其智巧而驕泰之意見於外也凡此十事皆不識所致故曰凡以爲不信不信不誠實也若見實理則無此病矣邊境之間若有此等人必指之以爲賊謂其機心太重不循乎自然處世能招禍也夫子曰夫道於大不終於小不遺故萬物備廣在乎其無不容也淵乎其不可測也形德仁義神之末也非至人孰能定之

夫子老子也大而無極曰大不終細而無餘曰小不遺即語大莫能載語小莫能破也萬物不能外此道故曰萬物備廣々乎大也淵乎深也形而爲德爲仁爲義皆其妙用之餘也形々見也神妙用也定審定也非至人孰能定其本末也

夫至人有世不亦大乎而不足以爲之累天下奮據而不與之偕審乎無假而不與利遷極物之真能守其本故外天地遺萬物而神未嘗有所困也通乎道合乎德退仁義賓禮樂至人之心有所定

矣

有世有天下也雖有天下之大而不足累其心
據權也雖奮而執天下之據此心亦不與之偕
往言心不動也不爲利遷言不計利害也究極
萬物真實之理故能守其本然之靜外天地遺
萬物不動於外也其心不動神又何所困乎通
同也道德自然也退仁義以仁義爲後而非其
所先也賓禮樂主以情性而禮樂爲賓也定靜
也此至人之心所以靜定也

世之所貴道者書也書不過語々有貴也語之所

貴者意也意有所隨意之所隨者不可以言傳也
而世因貴言傳書世雖貴之哉猶不足貴也爲其
貴非其貴也故視而可見者形與色也聽而可聞
者名與聲也悲夫世人以形色名聲爲足以得彼
之情夫形色名聲果不足以得彼之情則知者不
言々者不知而世豈識之哉

書能載道世所以貴之然貴在道而不在書也
以道爲言故其言可貴然所貴者意而不在言
隨向也意之所向言不得而傳則言之與書皆
不足貴矣以此爲貴皆不足貴故曰爲其貴非

其貴也。名亾言也。形色則可見。名聲則可聞。道
豈有形色名聲哉。以不可見不可聞之道而世
人欲以見聞得其實可悲也哉。情竇也。果斷也。
見聞斷然不足以得之。故知道者必不言而有
言者必非知道者也。今世之人其識見豈及此
所以可悲也。

桓公讀書於堂上。輪扁斲輪於堂下。釋椎鑿而上
問桓公曰。敢問公之所讀者何言邪。公曰聖人之
言也。曰聖人在乎。公曰已死矣。曰然則君之所讀
者。古人之糟魄已夫。桓公曰。寡人讀書。輪人安得

譏乎。有說則可。無說則死。輪扁曰。臣也以臣之事
觀之。斲輪徐則井而不固。疾則苦而不入。不徐不
疾。得之於手。而應於心。口不能言。有數存焉。於其
間。臣不能以喻臣之子。臣之子亦不能受之於臣。
是以行年七十而老斲輪。古之人與其不可傳也
死矣。然則君之所讀者。古人之糟魄已矣。

此段只前段之意。謂道不可以言傳而設喻如
此。極爲精妙。甘滑也。若澁也。徐寬也。疾緊也。寬
則甘滑易入而不堅緊。則澁而難入。要得不寬
不緊。自有分數存乎其間。但是說不出。雖父之

莊子外篇卷五
莊子外篇天道第十三

於子亦不可傳書載古人之言耳其人不存則其不可傳者何從得之糟粕之餉豈知酒味哉道而可獻人莫不以獻諸其君道而可傳人莫不以傳於其子亦此意也大凡著書所載所言必非一事此書翻來覆去只說一箇自然之理而撰出許多說話愈出愈奇別無第二題目若如此看愈見莊子不可及處讀佛書者亦然

莊子外篇天運第十四

天其運乎地其處乎日月其爭於所乎孰主張是孰維綱是孰居無事推而行是意是者其有機緘而不得已邪意者其運轉而不能自止邪雲者爲雨乎雨者爲雲乎孰隆施是孰居無事滌樂而勸是風起北方一西一東有上彷徨孰噓吸是孰居無事而披拂是

此數行句句精絕五句乎字前無古人後無來者天行一日一周天之自運乎地有四遊上下豈一定而處乎日往月來却喚作爭其所言如

人相追奪也此三字誰下得主張維綱但是著力之意機緘不得已運轉不能自止言亦不由他也天氣下降地氣上騰所以爲雲爲雨但不知雲爲雨乎雨爲雲乎如此設問豈不竒特隆施隆起也施止也與張弛同言或作或止孰爲之也淫樂淫放也樂戲劇也勸助也言何人爲放意戲樂之事而助成此雲雨也四方皆有風此言起北方者順天形而言之天倚於北則風自北來或西或東或上或下彷徨往來之貌言上不言下文法也披拂搖蕩也

敢問何故巫咸詔曰來吾語汝天有六極五常帝王順之則治逆之則凶九洛之事治成德備監照下土天下載之此謂上皇

發問不言人名又是自下少筆法六極六氣也五常五行也六氣五行皆自然之理也九洛九州也洛聚洛也洛與落同古字通用治成德備言帝王順此自然之理以治九州功成而德備照臨天下而人皆戴之此乃三皇向上人也故曰此謂上皇

商太宰蕩問仁於莊子七七曰虎狼仁也曰何謂

也莊子曰父子相親何爲不仁曰請問至仁莊子曰至仁無親太宰曰蕩問之無親則不愛々々則不孝謂至仁不孝可乎莊子曰不然夫至仁尚矣孝固不足以言之此非過孝之言也不及孝之言也

以虎狼爲仁便與盜亦有道意同此皆排抑儒家之論但其言雖偏亦自有理謬云惡虎不食子知有父子即爲仁矣至仁無親者言相親而不自知乃仁之至也孝不足言者盡仁之至則孝不待言也至仁過於孝若太宰所問乃是不

及孝之言々汝未能盡仁則於孝爲不及我既盡仁則過之矣

夫南行者至於郢北面而不見冥山是何也則去之遠也故曰以敬孝易以愛孝難以愛孝易而忘親難忘親易使親忘我難使親忘我易兼忘天下難兼忘天下易使天下兼忘我難夫德遺堯舜而不爲也利澤施於萬世天下莫知也豈直太息而言仁孝乎哉夫孝第仁義忠信貞廉此皆自勉以役其德者也不足多也故曰至貴國爵并焉至富國財并焉至願名譽并焉是以道不渝

冥山在北自北而南行至於郢則望北山皆不見矣此是去之已遠非不及也等閑小亾譬喻以發過孝不及孝之意亦自奇特敬孝猶有迹也愛孝則相忘矣自此以下曰忘親曰忘天下天下忘我但要一節高一節此書筆法例如此皆以有迹不若無迹有心不若無心遺棄也蔑視之意蔑視堯舜不足以爲德澤及萬世不足以爲仁又豈以仁孝自誇羨哉太息而言嗟嘆自誇也孝第仁義忠信廉貞八者世人以爲美德其實相勸勉以自苦而已故曰自勉以役其

德不足多也役勞也不足多不足尚也我之至貴何取於國爵我之至富何取於國財我之至願何取於名譽并音屏言皆屏去之也至貴至富至願無爲之道也國財埠國之財也不渝不變即所謂當然也八者有爲以自役而我常無爲也

北門成問於黃帝曰帝張咸池之樂於洞庭之野吾始聞之懼復聞之怠卒聞之而惑蕩々默々乃不自得

此段把樂來粧撰一項說話又是一般奇特始

夫至樂者先應之

以人事順之。終天理行之。以五德應之。貞然後調理四時。太和萬物。

而懼繼而怠。終而惑。言我聞此樂如此。三變蕩蕩精神散也。默々口噤也。不自得不自安也。爲此樂所驚駭也。

帝曰。汝殆其然哉。吾奏之以人。徽之以天。行之以禮義。建之以太清。四時迭起。萬物猶生。一盛一衰。文武倫經。一清一濁。陰陽調和。流光其聲。蟄蟲始作。吾驚之以雷霆。其卒無尾。其始無首。一死一生。一僨一起。所常無窮。而一不可待。汝故懼也。

汝殆其然哉。言我之樂而汝聽之。宜其如此。三變也。奏作也。徽猶琴徽也。行之建之。動作聳起。

也。人之事也。天之理也。禮義聲有條理也。太清合造化也。謂始作之聲平正如此。自四時迭起以下。又言作用之時變化驚動可喜可愕。且作且止。而未見歸宿之地也。發生文也。肅殺武也。倫經次序也。四時生殺萬物循序而生長。既盛復衰。猶樂聲之有文武倫序也。琴有文武絃。即此文武之類。故曰文武倫經。流光流暢。光華也。調其陰陽清濁之聲。如此流暢。光華若蟄蟲將奮而雷發聲之時。迎之不見其首。隨之不見其時。終故曰其卒無尾。其始無首。首尾即終始也。

死生債起所常無窮言或作或止既常且變故其常者無窮也求其歸一之地而未得故曰一不可待汝之初聞所以懼者如此

吾又奏之以陰陽之和燭之以日月之明其聲能短能長能柔能剛變化齊一不主故常在谷滿谷在阨滿阨墜卻守神以物爲量其聲揮綽其名高明是故鬼神守其幽日月星辰行其紀吾止之於有窮流之於無止子欲慮之而不能知也望之而不能見也遂之而不能及也儻然立於四虛之道倚槁梧而吟目知窮乎所欲見力屈乎所欲逐吾

既不及已矣形充空虛乃至委蛇汝委蛇故怠

陰陽之和日月之光亦只是和暢光華之意長短剛柔同爲變化不可指定故曰變化齊一不主故常齊一同也故舊也不主故常言愈出愈新也滿阨滿谷言塞乎天地之間也塗卻塞其聰明也卻與隙同言七竅也黜其聰明而守之以神隨萬物而爲之劑量言我之作樂不用智巧而循自然也其聲揮動寬綽自然有高明之名鬼神守其幽即其鬼不祟其魂不疲也日月星辰行其紀往來自然也若有止而又若無止

故曰止於有窮流於無止欲慮不知欲望不見
欲逐不及皆形容其似有物而非有物之意四
虛即太虛也我當是時立於泰虛之中隱几而
吟且欲見而不可窮欲逐而不可及其形雖充
滿而自忘其身若空虛然乃至於委蛇放弛而
况汝乎汝惟如此放弛所以怠也隣然無心貌
也

吾又奏之以無怠之聲調之以自然之命故若混
遂叢生林樂而無形布揮而不曳幽昏而無聲動
於無方居於窈冥或謂之死或謂之生或謂之實

或謂之榮行流散徙不主常聲世疑之稽於聖人
聖巴也者達於情而遂於命也天機不張而五官皆
備此之謂天樂無言而心悅故有焱氏爲之頌曰
聽之不聞其聲視之不見其形充滿天地苞裹六
極汝欲聽之而無接焉而故惑也

無怠不已也自然之命即自然之理也若混逐
叢生者如萬物之叢生而混同相追逐也林樂
林然而樂言林々摠々無非樂也而不見其形
布散揮動而不容力以牽曳幽昏而不可聞變
動而無方所其所居乃在於窈々冥々不可窮

極不可窺測之地非生非死非華非實行流散
徙言不定也不主常聲即不主故常也世人至
此疑而不曉乃以問於聖人稽首考也問之意
也達於情者達於實理也遂於命者極於自然
也身之五官皆備而天機不動謂耳目手足雖
具而見聞動作皆不自知此則得其自然之樂
故曰天樂樸嚴經云反流全一六用不行即天
機不張五官皆備之意也無言而心悅謂其悅
樂有不容言者汝於此雖欲聽之而無所接所
以惑也到此又撰出一頌此乃文字紬繹之妙

處充滿天地苞裹六極即見塞乎天地此頌四
句本無別意添作一轉便成節奏此是作文之
法

樂也者始於懼亡故崇吾又次之以怠亡故遁卒
之於惑亡故愚亡故道亡可載而與之俱也

前言懼怠惑未見其意到歸結處方說愚而可
以入道這一轉尤妙蓋言人之求道須經歷如此
此境界方有進步處崇森爽之意怠而遁是欲
罷不能之時惑而愚是意識俱亡六用不行之
時看此三節便似禪家作用其間說樂雖作三

段亦無大分別但鼓舞其言而已

孔子西遊於衛。顏淵問師金曰。以夫子之行爲奚如。師金曰。惜乎而夫子其窮哉。顏淵曰。何也。師金曰。夫芻狗之未陳也。盛以箋衍巾以文繡尸祝齋戒以將之。及其已陳也。行者踐其首眷蘇者取而爨之而已。將復取而盛以箋衍巾以文繡遊居寢卧其下。破不得夢。必且數昧焉。今而夫子亦先生已陳芻狗。取弟子遊居寢卧其下。故伐樹於宋。削迹於衛。窮於商周。是非其夢邪。圍於陳蔡之間。七日不火食。死生相與鄰。是非其昧邪。

此段議吾聖人在孔子時已有荷蓀丈人楚狂接輿長沮桀溺皆是一種人芻狗結草爲狗以解厭也。祭時所用已則棄之箋筐也。衍筭也。蘇取草也。眯塵入其目也。蓋調儒者所學皆古昔陳言不足用於今世也。

夫水行莫如用舟。而陸行莫如用車。以舟之可行於水也。而求推之於陸。則沒世不行尋常。古今非水陸與。周魯非舟車與。今斬行周於魯。是猶推舟於陸也。勞而無功。身必有殃。彼未知夫無方之傳。應物而不窮者也。

川陸舟車之喻言時不同也無方之傳不執一之道也自古所傳自有隨時不執一之道所以應此而不窮

且子獨不見夫桔槔者乎引之則俯舍之則仰彼人之所引非引人也故俯仰而不得罪於人俯仰隨人而無所容心即無方應物之喻也故夫三皇五帝之禮義法度不矜於同而矜於治故譬三皇五帝之禮義法度其猶粗梨橘柚邪其味相反而皆可於口故禮義法度者應時而變者也

粗梨橘柚人皆美之而其味各不同此三王不同禮五帝不同樂之喻粗果屬似梨而酸今取後狙而衣以周公之服彼必齰齶挽裂盡去而後慊觀古今之異猶後狙之異乎周公也以古人之禮樂而強今人行之是強後狙而衣以人之服也不曰人之服而曰周公之服意在譏侮聖賢故多如此下字周公制禮有冠冕衣裳之制故曰周公之服

故西施病心而贖其里々々之醜人見而美之歸亦捧心而贖其里々々之富人見之堅閉門而

不出貧人見之挈妻子而去之走彼知羨贖而不知贖之所以美惜乎而夫子其窮哉

贖蹙額也以今人而學古人猶以里女而學西施之贖亡之所以羨者必有西施而後可道之所以行必見古人而後可而夫子言汝夫子也此段凡六譬喻節亡皆好爲文莫如於譬喻王臞軒邁嘗云平生要自做个譬喻不得纏思量得皆是前人已用了底莊子一書譬喻處件之奇特

孔子行年五十有一而不聞道乃南之沛見老聃

老聃曰子來乎吾聞子北方之賢者也子亦得道乎孔子曰未得也老子曰子惡乎求之哉曰吾求之於度數五年而未得也老子曰子又惡乎求之哉曰吾求之陰陽十有二年而未得老子曰然使道而可獻則人莫不獻之於其君使道而可進則人莫不進之於其親使道而可以告人則人莫不告其兄弟使道而可以與人則人莫不與其子孫度數禮樂也陰陽萬物之理也五年十二年初無義理但曰精粗求之又而未得介自道而可獻以下四句發得極妙即是道不可傳乃如此

發出這般言語

然而不可者無他也。中無主而不止。外無正而不行。由中出者不受於外。聖人不出。由外入者無主於中。聖人不隱。

中無主而不止。非自見自悟也。言學道者雖有所聞於外。而其中自無主。非所自得。雖欲留之不住。也外無正者。無所質正也。今禪家所謂印證也。在我既有所自得。而質之有道之人。得其印證。則可以自行。我無所得。則何以印證於人。此兩句雖分中外。其實只要自得也。由中出者。

不受於外。此謂教之者我之言。雖自中出。而汝不能受。吾與回言。終日不違。能受者也。汝不能受。則聖人不告汝矣。故曰聖人不出。由外入者。無主於中。此言受教者我言。雖自外而入。汝之聽汝。未有見而中無所主。雖聞其言。亦無得也。即禪家所謂從門而入者。不是家珍。汝旣無得。則但以聖人爲隱。聖人實不隱也。二三子以我爲隱乎。吾無隱乎。余便是此意。此四句儘自精微。須子細參究。道之不可傳。無它故也。其病在此四句而已。故先曰。然而不可者無它也。

名公器也。不可多取。仁義先王之蘧廬也。止可以一宿。而不可以久處。觀而多責。古之至人。假道於仁。託宿於義。以遊逍遙之墟。食於苟簡之田。立於不貸之圃。逍遙無爲也。苟簡易養也。不貸無出也。古者謂是采真之遊。

名不可多取。此譏儒者好名也。蘧芦草屋也。仁義不可久處。言有迹者不可久久也。觀見也。纔有聲迹可見。則禍患之所由生。故曰觀而多責。假道託宿不可久處也。過則化之意。苟簡苟且也。言隨時而不着相也。不貸者。猶今人言不折

本也。易養易足也。無出不用力。無費於我也。采真采取真實之理也。

以富爲是者不能讓祿。以顯爲是者不能讓名。親權者不能與人柄。操之則慄。舍之則悲。而一無所鑒。以闕其所不休者。是天之戮民也。

此即是貪夫徇財烈士徇名夸者死權之意。操之而患失。則恐慄舍之而迷惑。則自悲。三者皆然。無所鑒者。略無所見也。闕視也。所不休迷而不知返也。心無明見而不能反視其迷。此天奪其魄之人也。天之戮氏言。天罰之以此苦也。

怨恩取與諫教生殺八者正之器也唯循大變無所涖者爲能用之故曰正者正也其心以爲不然者天門弗開矣

君臣之間曰諫師友之間曰教有此入世則有此八者之用器用也用所當用曰正必無心者方能用之循大變順造化也無所涖無所汨也我能循造化而無所汨則在我者正而後可以正物我未能無心而以自然之理爲不然則是其胷中之天已昏塞矣故曰天門不開詩曰天之牖民便是天門之意

孔子見老聃而語仁義老聃曰夫擣糠眯目則天地四方易位矣蚊虻噏膚則通昔不寢矣夫仁義惛然乃憤吾心亂莫大焉吾子使天下無失其朴吾子亦放風而動撓德而立矣又奚傑然若負建鼓而求亡子者邪

嗜膚眯目偏諤逆心之喻也昔即夕也左傳曰居則備一昔之禍惛然毒之狀也言自苦也憤吾心逆吾心也亂莫大焉言自亂性也放風順化也順化而行故曰放風而動撓執也若使天下不失其本然之朴則皆順化而行執德而立

又何待教之乎王建路鼓于寢門建鼓言所建之鼓也招呼天下之人而教之猶負大鼓而求亡子也傑然自高之貌

夫鵠不日浴而白鳥不日黔而黑。白之朴不足以爲辯。名譽之觀不足以爲廣。泉涸魚相與處於陸。相呴以濕。相濡以沫。不若相忘於江湖。

鵠之白鳥之黑自然而然不待浴之黔之此二喻最佳。黔染黑色也黑白之朴言黑白皆有自然之質無美無惡不足致辯以名譽而觀示於天下便有是非之意。有奢則有毀此心便不廣。

大矣黑白是非之喻也。魚之呴濡其能幾何。若處之江湖則相忘於水中矣。至道之世各循自然無所是非則上下亦相忘矣。

孔子見老聃歸三日不談。弟子問曰。夫子見老聃亦將何規哉。孔子曰。吾乃今於是乎見龍。合而成體。散而成章。乘乎雲氣。而養乎陰陽。予口張而不能噏。予又何規老聃哉。

規諫也合而成體渾然者也。散而成章粲然者也。龍在天地之間可見而不可見故有散合之喻。乘乎雲氣在造化之上也。養乎陰陽言以天

地之道自樂也。嚙合也。張而不合無所容言也。子貢曰。然則人固有尸居而龍見。雷聲而淵默。發動如天地者乎。賜亦可得而觀乎。遂以孔子聲見老聃。々々方將倨堂而應微曰。予年運而往矣。子將何以戒我乎。子貢曰。夫三王五帝之治天下不同。其係聲名一也。而先生獨以爲非聖人。如何哉。老聃曰。小子少進。子何以謂不同。對曰。堯授舜。禹授禹。而湯用兵。文王順紂。而不敢逆。武王。授禹。不肯順。故曰不同。老聃曰。小子少進。余語遙紂而不肯順。故曰不同。老聃曰。小子少進。余語汝三王五帝之治天下。黃帝之治天下。使民心一

民有其親死不哭。而民不非也。堯之治天下。使民心親。民有爲其親時殺其殺。而民不非也。舜之治天下。使民心競。民孕婦十月生子。生五月而能言。不至乎孩而始誰。則人始有夭矣。禹之治天下。使民心變。人有心。而兵有順。殺盜非殺。人自爲種。而天下耳。是以天下大駭。儒墨皆起。其作始有倫。而今乎婦女。何言哉。

以孔子之聲見老聃。稱夫子之門人。而脩謁也。倨堂居於堂上。而自倨有傲物之意。應微言其問答之聲甚微也。黃帝之治順乎自然。自此以

下一節前篇亦屢有此意於此又添出數句頗
奇特制服以其親之輕重爲降殺故曰爲其親
殺其殺蓋言古無服而今制禮也古人十月四
而生兩歲而後言十月而生五月而言謂早也
誰問也未至於孩提而早能問人爲誰矣始早
也誰猶誰何也使民心變於古也人有心人
人各有私心也兵有順以用兵爲順事也爲盜
之人可殺則殺不以爲罪法禁詳矣當此時也
人皆自分種類各親其親各子其子也特共此
天下而居故曰而天下耳其作始有倫言其始

如此作爲之時人倫之道猶在今其弊也至於
亂倫而以女爲婦又何可言哉謂其不容諒也
禮記大道爲公一段亦有此意但莊子說得太
甚

余語汝三皇五帝之治天下名曰治之而亂莫甚
焉三皇之知上悖日月之明下睽山川之精中墮
四時之施其知惛於屬薈之尾鮮規之獸莫得安
其性命之情者而猶自以爲聖人不可耻乎其無
耻也子貢楚亡然立不安

三皇之知亦拂天地造化之理前此多尊三皇

而抑五帝到此又和三皇罵了蜃蠻即蜂類也
其尾有毒鮮少也規求也小獸之求不過鮮少
如狐狸之類言此等智巧其爲毒也亦如此小
蟲小獸而已皆譏侮而卑抑之言惛毒也蹙々
然不安之貌也

孔子謂老聃曰丘治詩書禮樂易春秋六經自以
爲久矣孰知其故矣以奸者七十二君論先生之
道而明周召之迹一君無所鉤用甚矣夫人之難
說也道之難明邪老子曰幸矣子之不遇治世之
君也夫六經先王之陳迹也豈其所以迹哉今子

之所言猶迹也夫迹寢之所出而迹豈寢哉

禮記中亦有老子呼聖人以名處想問禮於老
聃而師之孰知其故者孰知其典故也鉤取也
幸不遇者若有上古聖人更笑汝有寢則有迹
得其迹而不寢則不得其寢亦猶糟粕之喻也
夫白鶲之相視眸子不運而風化蟲雄鳴於上風
雌應於下風而風化類自爲雌雄故風化性不可
易命不可變時不可止道不可壅苟得於道無自
而不可失焉者無自而可孔子不出三月復見曰
丘得之矣烏鵲孺魚傳沫細腰者化有弟而兄啼

久矣夫丘不與化爲人不與化爲人安能化人老子曰可立得之矣

木火風三化之各不同類

此一段文之極奇者自鶲之雌雄不交而生子但眸子相視而已凡物皆風氣所生風字從禹便有生物之義故曰風化言生子也鳴於上風應於下風謂在上在下也黃帝順下風而行却與此同此風字與風化字又別類自爲雌雄言其雌雄在萬物之中自爲一類故能如此風化螟蠣之於螺蠃則非類而以兜化此則以相視而化也性命時道皆言自然之理不可違也烏

鵠孺々交尾也魚傳沫者相濡以沫而生子也細腰蜂也化々生也有弟而兄啼兄弟全母必乳絕而後生兄不得乳而後有弟故曰兄啼此句下得尤奇絕佛經中多有此類要盡文之妙此類皆不可不知不與章化爲人者言知人而未知天不能與造化爲一也此章以造化生々之理喻自然之道蓋謂儒者所學皆有爲之爲而非無爲之爲無爲之爲則與造化同功也佛經所言胎生卵生化生濕生其原必出於此其意却欲人知此身自無而有與萬物皆同所以

莊子外篇卷五
三十六
破世俗自私自戀之心又與此不同也

莊子外篇天運第十四

莊子外篇刻意第十五

刻意尚行。離世異俗。高論怨誹。爲亢而已矣。此山谷之士。非世之人。枯槁赴淵者之所好也。語仁義忠信恭儉推讓。爲脩而已矣。此平世之士。教誨之人。遊居學者之所好也。語大功立大名。禮君臣。正上下。爲治而已矣。此朝廷之士。尊主彊國之人。致功并兼者之所好也。就藪澤處間曠。釣魚間處。無爲而已矣。此江海之士。避世之人。閒暇者之所好也。吹响呼吸。吐故納新。經鳥申。爲壽而已矣。此導引之士。養形之人。彭祖壽考者之所好也。若夫

不刻意而高。無仁義而脩。無功名而治。無江海而間。不導引而壽。無不忘也。無不有也。澹然無極。而衆美從之。此天地之道。聖人之德也。

刻雕刻也。工苦用意以行爲尚也。爲尤爲高也。怨誹憤世嫉邪也。非世議論世事是非也。枯槁寂寞也。赴淵投赴淵靜也。即入林恐不密入山。恐不深之意爲脩好脩潔也。教誨之人爲師於世也。致功并兼是莊子當時目擊之語。避世間暇隱者也。逃世遠去超出是非之外故與爲亢非世者不同熊經鳥申即舉俠五禽之戲也。無

不忘無不有即無爲無不爲也。無極無定止也。衆美從之備萬善也。聖人得天地自然之道故如此也。

故曰。夫恬惔寂漠虛無。爲道此天地之平。而道德之質也。故曰。聖人休。休焉則平易矣。平易則恬惔矣。平易恬惔。則憂患不能入。邪氣不能襲。故其德全而神不虧。

此篇只是一片文字自此以下連下許多故曰字。臨末用一譬喻却以野語有之爲結須子細看它筆勢波瀾道德之質本然者曰質平易恬

惄即是無爲之意神不虧即是德全着此三字
愈見精神

故曰聖人之生也天行其死也物化靜而與陰同
德動而與陽同波不爲福先不爲禍始感而後應
迫而後動不得已而後起去知與故循天之理故
無天災無物累無入非無鬼責其生若浮其死若
休不思慮不豫謀光矣而不耀信矣而不期其寢
不夢其覺無憂其神純粹其魂不罷虛無恬惄乃
合大德

天行順天理而行也物化視身猶蛻也同波同

流也隨所感而後應我無容心故超出乎禍福
之外矣迫而後動不得已而後起無心應物之
意也知私智也故事迹也夫其私智離於事迹
則循乎自然矣若淳若休即泛然無著之意不
思慮不豫謀即何思何慮也光而不耀自晦也
信而不期不取必於物也其神全故純粹其魂
靜故不勞罷與疲同

故曰悲樂者德之邪喜怒者道之過好惡者德之
失故心不憂樂德之至也一而不變靜之至也無
所於忤虛之至也不與物交淡之至也無所於逆

粹之至也

有所悲樂有所喜怒有所好惡則非自然矣憂樂不係於其心方爲至德一而不變便是主一而無適也無所於忤順自然也忤逆也不與物交感而後應雖與物接而不爲物所累也曰靜曰虛曰惔曰粹即是一個自然之德如此發揮忤者人忤我也以處受之則無忤矣逆者我不逆物也逆迎也不將不逆則在我者純粹矣故曰形勞而不休則弊精用而不已則勞久則竭水之性不雜則清莫動則平鬱閉而不流亦不能

清天德之象也故曰純粹而不雜靜一而不變淡而無爲動而以天行此養神之道也

形勞則弊精用則勞此養生家切實之語即前篇不搖其精乃可長生是也勞而不已必至於竭故曰勞則竭以水爲喻雖似尋常之說但曰鬱閉而不流亦不能清則非全然如枯木死灰矣不難則清莫動則平此無爲也不流不能清此無爲之中有爲也香嚴所謂喚做閑坐又不得也鬱閉而不流則是禪家所謂坐在黑山下鬼窟裏所謂默照邪禪也天之行也一日一周

非無爲之有爲乎故曰天德之衆也養神即是養生提起一个神字便親切了此便是道家之學釋氏却不肯說這般神字如曰無始以求生死本癡人喚作本來身便是罵破這般神字夫有干越之劍者抑而藏之不敢用也寶之至也精神四達並流無所不極上際於天下蟠於地化育萬物不可爲象其名爲同帝純素之道唯神是守而勿失與神爲一之精通合于天倫

寶愛其劍則押而藏之劍且如此况精神乎此精用則勞之譬也四達旁流下蟠上際言精神

之用如此也並流同流也化育萬物亦此神也然而無迹可見故曰不可爲象同帝者謂功用與天帝同也爲純素之學者其始則准神是防守而勿失用功久也久則與神爲一矣此大而化之之時也守而未化猶與道爲二也化則與道爲一矣天倫即天理也一而至於精通則與天合此聖而不可知之謂神也此一章頗與吾書合但說得鼓舞變動遂成異端

野語有之曰衆人重利廉士重名賢士尚志聖人貴精故素也者謂其夢無所與雜也純也者謂其

不虧其神也能體純素謂之真人

野語田野之語猶里語也聖人貴精亡即神也以利名志三句形此一句也素一色也故曰無所雜純渾全也故曰不虧純素即乾之純粹精也真人至人也前曰聖人之德此又曰真人便如內篇所謂至人無已神人無名皆只是聖人字却換許多名字非曰真人至人又高於聖人也

刻意言養神而有天行物化之論

繙性言存身而有時命行謬之說以 養神存

身分作兩篇此其分別學問工夫處讀者不會子細爲之參究甚孤于莊子千載之意

莊子外篇繕性第十六

繕性於俗。今學以求復其初。滑欲於俗。思以求致其明。謂之蔽蒙之民。

繕性治性也。繕性以俗學譏當時儒墨之言性也。初自然之理性也。滑汨沒也。滑欲於俗以利欲滑沒於世俗之中也。明虛明之理也。以俗學治性而求復其理性之初。滑於利欲而思欲致虛明之地。此至愚而無知者也。蔽蒙之民。以此名俗學之愚者也。文字起語最難如此。喝起三句方說古之治道者。真是好文字。東坡言因讀

莊子而悟作文之法寢之而後知也

古之治道者以恬養知生而無以知爲也謂之以知養恬知與恬交相養而和理出其性夫德和也道理也德無不容仁也道無不理義也義明而物親忠也中純實而反乎情樂也信行容體而順乎文禮也禮樂徧行則天下亂矣彼正而蒙已德之則不冒之則物必失其性也

恬靜定也定能生惠故曰以恬養知之吾有生之初本來無物何以知爲如此而後能靜定故曰以智養恬二者交相養而後得其自然之性

一理順也和理猶曰和順也靜定而得其本然和順之性故曰和理出於性之字即自然字恬養知之養恬此六字最妙釋氏有曰戒生定之生惠却未說惠能生定也如此等處當子細讀道德即是和順故曰德和也道理也無不容即無不受也無不理即各得其宜也義明於中而後能與物親便是盡已之謂忠也情發見者也以中心即是樂則生矣生則烏可已也故曰中純實而反乎情樂也信其容體之所行而有自然

之節文即是動容周旋皆中禮也故曰信行容體而順乎文禮也信任也信行猶安行也外求禮樂而不知其本故曰偏行猶言只見得一半也蒙晦也德積於已不自眩露而彼物自正故曰彼正而蒙已德彼正即物正也不冒者言我非以德加諸人也德不自晦而求以加諸人則失其自然者矣故曰冒則物必失其性以善服天下不若以善養天下便是此意從平音
徧誤也

古之人在混芒之中與一世而得澹漠焉當是時也陰陽和靜鬼神不擾四時得節萬物不傷群生

不夭人雖有知無所用之此之謂至一當是時也莫之爲而常自然

混芒之中即晦藏不自露之意澹然漠然上下不相求之意舉世皆純全而於道無所欠闕故曰至一莫之爲者言無所容力也鬼神不擾山川鬼神莫不寧也四時得節天地節而四時成也

逮德下衰及燧人伏戲始爲天下是故順而不一德又下衰及神農黃帝始爲天下是故安而不順德又下衰及唐虞好爲天下興治化之流濃醇散

朴離道以善。險德以行。然後去性而從於心。心與
心識。知而不足以定天下。然後附之以文。益之以
博。文滅質。博溺心。然後民始惑亂。無以反其性情
而復其初。

三个下襄其文自奇。知有理之可順則其純者
一已離矣。故曰順而不一人各以理爲安。則知
有已知有己。則離於道矣。故曰安而不順作意
於爲天下而興其教化。則非無爲自然者。故曰
湧醇散朴。湧漓也有善之名。則遠於道矣。有行
之可見。則德不平易自然矣。故曰離道以善。險

德以行。險不平易也。去其自然之性而從其有
爲之心。故曰去性而從於心。我以有心爲彼。以
有心應。故曰心與心識。乍相識察也。似此心字
皆機心也。文者文華也。博者名物之多也。禮樂
庶事備也。用其知不足。又附益之以禮樂。故曰
知而不足以定天下。附之以文。益之以博。乍繫
多而寡要也。用心於此。則猶陷溺也。

由是觀之。世喪道矣。道喪世矣。世與道交相喪也。
道之人。何由興乎世。亦何由興乎道哉。道無以
興乎世。亦無以興乎道。雖聖人不在山林之中。其

德隱矣。隱故不自隱。

道與世交相喪言兩不相入也既不相入則有道之人何能作興^此俗之聞見世俗之人又何由而知道舉世皆不知道則聖人雖在目前亦不知矣非聖人自隱矣人不知之不求隱而自隱矣故曰隱故不自隱言其所以隱者非聖人故意自隱也在目前而人不識之也此五字下得亦奇

古之所謂隱士者非伏其身而弗見也非閉其言而不出也非藏其知而不發也時命大謬也當時

命而大行乎天下則反一無迹不當時命而大窮乎天下則涼根寧極而待此存身之道也源根者與根源同之莫爲樹根世事根底不斷之源遠矣

因上面隱字又拈起隱士來說隱士非欲伏身閉言藏知時不可也藏知非無道則愚也時命大謬言與時命大相戾也謬戾也反一無迹者言成功而不有也道雖可行而付物於無心在我者一而已矣故曰反一根極即自本自根也極止也涼根猶曰退藏於密也寧極猶曰安汝止也存我以待時故曰源根寧極而待存身即

存我也

源根者錦遠之

古之行身者。不以辯飾知。不以知窮天下。不以知窮德。危然處其所而反其性已。又何爲哉。道固不行德。固不小識。小識傷德。小行傷道。故曰。正已而已矣。樂全之謂得志。

因存身字又說个行身存不用之時也。行用之時也不以辯飾知。有所知見不飾以文辭。也不以知窮天下有餘不敢盡。也不以知窮德雖用知而不失其自然之性也。危然處其所。立者高也。而反其性已。即所謂反一無迹也。無爲者。

道之大也有爲則爲小行。小行則害道矣。不識不知者德之大也。有所識知則爲小識。小識則喪德矣。正已而物自正。初不求於正物。故曰正已而已矣。以此爲樂。則所樂者全矣。其快意者在此。不在外物也。得志猶快意也。以此二字生下一段文法也。

古之所謂得志者。非軒冕之謂也。謂其無以益其樂而已矣。今之所謂得志者。軒冕之謂也。軒冕在身。非性命也。物之儻來寄也。寄之其來不可圉。其去不可止。故不爲軒冕肆志。不爲窮約趨俗。其樂

彼與此同故無憂而已矣今寄去則不樂由是觀之雖樂未嘗不荒也故曰喪已於物失性於俗者謂之倒置之民

足於內者無求於外故曰無以益其樂便是萬物皆備於我反身而誠樂莫大焉性命天爵也軒冕外物也適然來故曰儻來去留在彼而不可必故達亦不肆窮亦不屈故曰不爲軒冕肆志不爲窮約趨俗趨俗者屈已以趨時也彼道也其樂道與他人樂軒冕同故曰樂彼與此同

樂者在我則無時而能憂樂者在物則物去而樂亦去矣其樂既有去來則非真樂故曰雖樂未嘗不荒也倒置者言不知本末也已與性本也物與俗末也重末而失其本故曰倒置之民此篇亦是一片文字最要看它結上生下起下接上處



